

# Anggota2 UMNO harus ikhlas

CHANGLOON, Isnin — Tiga prinsip — idealisma, nasionalisma dan ilmu — harus ada di dada setiap ahli UMNO supaya mereka tidak mudah digugat oleh cabaran dan pengaruh, kata Datuk Mohamed Najib Tun Abdul Razak.

Berucap, merasmikan kursus kesedaran politik anjuran Pergerakan Pemuda UMNO kawasan Changloon di sini semalam, beliau berkata idealisma mesti berasaskan agama Islam dan bangsa Melayu dan bukan berbentuk kebendaan.

Ahli-ahli UMNO khususnya pemuda harus ikhlas dalam memperjuangkan matalamat parti dan jangan mengharapkan ganjaran kebendaan dari perjuangan mereka itu.

## Kritikal

Golongan pemuda juga harus berterima kasih kepada pemimpin lama yang telah memerdekakan dan membangun negara ini, katanya.

Ilmu adalah pendinding daripada dipengaruhi oleh golongan lain ke arah cara pemikiran politik mereka.

“Dengan ilmu pengetahuan yang tinggi, ahli-ahli UMNO dapat membezakan yang baik dan yang buruk serta dapat menangkis penyerapan parti lawan,” tegasnya.

Pemuda UMNO, katanya, mesti meneruskan peranan bebas dan kritikal dalam UMNO. Mereka mesti berani mengeluarkan pendapat yang membina walaupun pendapat-pendapat itu mungkin pedas didengar.